

Kesepaduan Rakyat dan Pemimpin ke Arah Bangsa Melayu Yang Merdeka

Oleh

Dr. Muhammad Hadi bin Abdullah@Muhammad Melayong

Generasi masa kini dan masa akan datang adalah berkewajipan dan bertanggungjawab untuk bersepodu mempertahankan kedaulatan Negara Brunei Darussalam yang merdeka, dan mempastikan kesinambungannya dalam era cabaran globalisasi pada abad ke 21 ini. Sebagaimana Almarhum Sultan Abdul Momin (1852-1885) pernah meninggalkan 'amanat' ataupun 'wasiat' baginda pada tahun 1885 kepada pemimpin-pemimpin Brunei dewasa itu supaya tidak menyerahkan atau menyewakan wilayah-wilayah Brunei kepada orang-orang asing. Dengan perkataan lain sikap mementingkan diri sendiri patut dikikis demi kepentingan bangsa dan negara. Kehancuran dan kemerosotan empayar Brunei dalam abad ke-19 dan awal ke-20 adalah akibat daripada ketidaksepadan di kalangan orang-orang besar dan rakyat sendiri dalam mempertahankan kedaulatan negara. Sikap pentingkan diri sendiri menyebabkan maruah dan kedaulatan tergadai. Bertitik tolak dari keadaan inilah, Sultan Abdul Momin telah berusaha bagi memastikan empayar Brunei terus wujud sebagai sebuah negeri yang berdaulat dan merdeka daripada dikuasai oleh orang luar, khususnya British. Bagaimanapun harapan baginda telah tidak musnah kerana Brunei tidak dapat mempertahankan kedaulatannya

iaitu terpaksa bernaung di bawah panji-panji British hampir satu abad lamanya.

Meskipun Brunei telah dapat mengembalikan kedaulatannya pada tahun 1984 namun dalam era globalisasi masa kini, proses penjajahan atau *neo-colonialism* moden tetap akan berlaku bukan sahaja dari segi wilayah dan politik, tetapi melibatkan aspek ekonomi, sosial, mental, keagamaan dan kebudayaan. Oleh sebab itulah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izaddien Waddaulah pada 1 Januari 1984 telah mengingatkan bahawa bukan sahaja kepada pemimpin juga rakyat jelata supaya bersepodu untuk mempertahankan kedaulatan Negara dan bangsa Melayu Brunei yang berdasarkan falasafah Melayu Islam Beraja dan mengharapkan agar statusnya sebagai Negara Melayu Islam Beraja akan terus kekal buat selamalamanya.

Sempena dengan tema hari kemerdekaan Negara Brunei Darussalam yang ke-21 ini iaitu ‘Bersepodu Memperkasa Mandiri Bangsa’, maka adalah sesuai sekiranya diimbas kembali sejarah awal perjuangan pemimpin dan rakyat Brunei dalam mendapatkan kemerdekaan negara ini. Diharap agar penampilan ini perjuangan mereka itu akan dapat ‘diharga’ dan ‘diambil ikhtibar’ oleh generasi masa kini dan masa akan datang dalam usaha mempeksa mandiri bangsa Brunei. Dengan lain perkataan kejayaan pemimpin dan rakyat Brunei dalam mandiri satu bangsa Melayu yang merdeka

pada tahun 1984 adalah kesan dari wujudnya semangat kesepaduan di antara rakyat dengan pemimpin dalam sama-sama berganding bahu menghadapi cabaran dan rintangan dari dalam dan luar negara.

Oleh itu adalah bertepatan dengan tema Hari Kemerdekaan tahun ini untuk membincangkan cabaran dan halangan yang pernah dilalui oleh pemimpin dan rakyat negara ini dalam usaha untuk melahirkan satu bangsa yang merdeka yang telah kita capai 21 tahun yang lalu. Kemenangan dan kejayaan yang telah dicapai adalah hasil dari semangat kerjasama dan gotong royong di kalangan rakyat dan penduduk negera ini dalam menyokong polisi dan dasar yang telah dilaksanakan oleh pihak pemerintah. Maka dalam kertas kerja ini isu utama yang akan diketengahkan adalah mengenai semangat kesepaduan yang patut wujud dalam masyarakat Brunei untuk survival dan kesinambungan bangsa Melayu pada masa akan akan datang. Pentingnya semangat kesepaduan ini jelas berdasarkan kepada pengalaman-pengalaman yang telah dilalui oleh rakyat dan penduduk Brunei iaitu akibat daripada semangat sebaliknya telah membawa kepada kehancuran dan kebinasaan pada bangsa itu sendiri. Dan kita berharap ‘sejarah berulang’ tidak akan berlaku dalam sejarah Negara ini.

Kesepaduan semangat perjuangan yang pernah lahir di kalangan pemimpin dan rakyat Brunei yang lalu itu patut dipupuk

dalam sanubari generasi muda masa kini. Golongan tua pada masa lalu adalah merupakan perintis dan penegak martabat dan kedaulatan bangsa Melayu Brunei patut contohi. Dengan kata lain, semangat bersepadu yang lahir dalam jiwa dan sanubari pejuang kebangsaan Brunei pada awal tahun 1940an adalah merupakan faktor kepada keteguhan dan kekuahan negara Melayu Islam Beraja. Hasil dari perjuangan tersebutlah merupakan kemakmuran, kemajuan dan kenikmatan yang telah dimiliki oleh kita pada masa kini.

Meskipun proses pembentukan negara yang merdeka memakan masa yang agak lama akibat dari banyaknya halangan-halangan yang dilalui. Bagaimanapun, dengan adanya semangat kesepaduan di kalangan pemimpin dan rakyat negeri ini akhirnya mereka berjaya mencapai matlamat mereka. Sebagai pembuka kata kita seharusnya berterima kasih kerana telah berhutang budi kepada pejuang bangsa kita pada masa lalu, sama ada mereka itu masih hidup ataupun sudah kembali ke rahmatullah. Ini termasuk perintis nasionalisme Brunei yang awal iaitu Almarhum Sultan Ahmad Tajuddin Akhazul Khairi Waddien dan pengasasnya Almarhum Sultan Haji Omar 'Ali Saifuddien Sa'adul Khairi Waddien yang telah berusaha untuk mengembalikan kedaulatan Brunei dari naungan British. Sikap dan pendirian kedua-dua pemimpin ini yang telah berganding bahu dengan rakyat Brunei dalam pergerakan menuntut kemerdekaan sebelum dan selepas Perang Dunia Ke-II telah mengukuhkan

semangat perjuangan di kalangan rakyat jelata untuk bertindak lebih berani lagi.

Wujudnya semangat kesatuan dan kerjasama baginda berdua dalam pergerakan awal nasionalisme Brunei telah menyebabkan segolongan rakyat jelata bangkit tanpa takut-takut untuk menentang kehadiran pemerintah asing yang dianggap sebagai pengancam maruah dan martabat bangsa Melayu di bumi Brunei ketika itu. Dengan perkataan lain berdasarkan Perjanjian 1888 dan juga 1905/1906 pentadbiran negeri Brunei adalah dikuasai dan diketuai oleh orang British khususnya Residen.

Pentadbir British telah mengambil bangsa asing yang ada di Brunei terutama mereka yang fasih bertutur bahasa Inggeris untuk mengisi kekosongan dalam menjalankan jentera pentadbiran negeri.¹ Pada praktiknya pentadbiran negeri adalah dikuasai oleh Residen British walau pada teorinya mengatakan bahawa baginda Sultan dikehendaki menerima nasihat Resident British dalam semua hal kecuali bidang adat-istiadat dan agama Islam.² Oleh itu pengurusan hal ehwal politik, ekonomi, kewangan, keselamatan dan sebagainya adalah di tangan Residen British.³

Ini bermakna sebelum Perjanjian Perlembagaan 1959 ditandatangi, kuasa mentadbir negara adalah dibawah Residen British. Oleh itu beliaulah yang memerintah serta membuat polisi

dan dasar pentadbiran negera melalui kuasa yang ada pada beliau dengan menasihati baginda Sultan. Kuatnya kedudukan dan kuasa Residen dalam pentadbiran di Brunei menyebabkan orang Melayu tersingkir di negara sendiri. Keadaan ini telah menyebabkan timbul rasa tidak puas hati dan wujud perasaan anti-British bagi sebilangan golongan yang berpendidikan di Brunei. Semangat perjuangan dan kesedaran untuk melahirkan satu bangsa dan negara merdeka dengan menegakkan Sistem Kesultanan adalah merupakan intipati penting dalam kesepaduan antara pemimpin dan rakyat dalam untuk mencapai taraf kemerdekaan daripada nauangan British yang berlangsung hampir satu abad yang hanya berdasarkan kepada dua surat perjanjian yang ditandatangani antara kedua buah negara pada tahun 1888 dan 1905-1906.

Keadaan kehidupan rakyat Brunei ketika itu pernah digambarkan oleh seorang warga British iaitu Jorgan Bisch dalam bukunya bertajuk *Ulu: The World's End*. Antara lain beliau menyebut :

"The whites nearly all have cars, refrigerators, and plenty of money, why not also the Dyaks and Malays? While the white man works, while he make his calculations, while devises ever better methods of wresting wealth from the earth, while he drives his car from meeting to meeting, the brown man sits in the shade of the trees, speculating on the iniquity of not being presented with a car himself. The oil that flows, flows in his country".⁴

Keadaan kehidupan yang serba kekurangan di samping kenikmatan yang dimiliki oleh orang asing ini menyebabkan timbul kesedaran untuk melahirkan satu bangsa Melayu merdeka yang tidak lagi bergantung pada orang lain. Dan kita berasib baik, kerana dengan wujud kesedaran seperti ini, maka anak tempatan mula dihantar belajar ke seberang laut, khususnya Persekutuan Tanah Melayu yang bermula pada akhir tahun 1920an. Mereka inilah yang kemudiannya menjadi pemimpin politik di Brunei dalam tahun 1950an dan 1960an yang terus berjuang berganding bahu dengan Almarhum Sultan Omar 'Ali Saifuddien untuk memperjuangkan maruah bangsa dan kedaulatan negara ini.

Pengorbanan rakyat dan pemimpin masa lalu bukan saja dari harta dan wang ringgit tetapi juga sanggup menpertarungkan nyawa dan darah kerana Bangsa, Negara dan Raja. Sebagaimana kata H. M. Salleh, seorang pemimpin awal nasionalis Brunei pada tahun 1940an, slogan pintu gerbang yang berbunyi "*Sole right for the Sultan*" dan "*Restorer of Peace and Justice and his subject*" hanya boleh diubah dengan menggunakan darah atau pintu gerbang tersebut ditebang sahaja dengan kapak.⁵

Kata-kata ini diluahkan apabila orang asing di Brunei mengarahkan pemimpin-pemimpin Barisan Pemuda (BARIP) memandangkan slogan yang ditulis di atas pintu gerbang BARIP sempena lawatan Mr. Makcolm Mac Donald, Persuruhjaya Tinggi

British bagi Asia Tenggara ke Brunei pada tahun 1946.⁶ Pemimpin BARIP dan rakyat Melayu telah bersatupadu dengan beranisehingga sanggup berkorbankan nyawa mereka untuk mempertaharkan maruah Bangsa dan Negara. Semangat pejuang yang kental inilah yang patut diwarisi dan ditanam dalam jiwa pemimpin dan Generasi Brunei masa kini dan bukannya sebaliknya. Semangat perjuangan yang begitu kukuh yang dimiliki golongan muda masa itu digambarkan melalui kesepakatan mereka menyingsing lengan baju hingga ke siku sebagai lambang kesatuan, kekuatan dan keteguhan. Dan pendirian mereka ini telah didokong oleh Sultan Ahmad Tajuddin sendiri. Mereka juga mengangkat tangan sambil melaungkan perkataan "merdeka" apabila bersua sesama mereka

Pemimpinnya sendiri H.M. Salleh sanggup akan membakar semua kedai asing di Bandar Brunei kerana tidak menghormati hari perkabungan kemangkatan bonda Sultan Ahmad Tajuddin. Ini dilakukan kerana orang-orang Cina dengan sengaja tidak mahu menaikkan bendera setengah tiang.⁷ Gugutan terhadap kedaulatan bangsa dan Raja inilah faktor penting mendorong generasi muda pada tahun 1940an bangkit dengan suara lantang menentang penguasaan dan pertapakan bangsa asing di Brunei.

Dalam mengimbas kembali gambaran semangat bersatu padu, rakyat Brunei yang didokong oleh Raja mereka dapat dilihat berdasarkan kewujudan beberapa badan dan organisasi politik

sebelum dan sesudah sejak Perang Dunia Ke-II. Kesedaran untuk memerdekaan Brunei daripada tangan British memang telah wujud sebelum kedatangan Tentera Jepun pada TM 1941. Kesedaran untuk melahirkan satu negara dan satu bangsa Brunei yang diperintah oleh orang Brunei sendiri timbul memandangkan mundur dan miskinnya kehidupan orang Melayu Brunei ketika itu. Kesusahan dan kesengsaraan kehidupan generasi tua masa itu boleh diketahui melalui cerita-cerita dan pengalaman orang-orang tua yang masih hidup masa kini. Misalnya dalam soal pentadbiran negara selepas Perang Dunia Ke-II, majoritinya adalah dikuasai oleh orang-orang asing iaitu termasuk Pegawai British sendiri. Hanya segelintir saja anak tempatan menjawat jawatan guru khususnya golongan terpelajar yang berpendidikan dari lepasan Maktab Sultan Idris Tanjung Malim, Perak. Dan anak tempatan yang pertama yang dihantar ke maktab ini ialah Awang Marsal bin Maun dan Awang Basri bin Taha pada tahun 1920an.⁸ Golongan guru lepasan dari maktab inilah yang memainkan peranan penting dalam perkembangan pentadbiran dan juga pendidikan di Brunei khususnya selepas zaman pendudukan tentera Jepun di Brunei pada tahun 1945.

Antara tokoh-tokoh awal politik Brunei yang telah berjuang bersama-sama dengan pemimpin negara (Sultan Ahmad Tajuddin dan Sultan Haji Omar ‘Ali Saifuddien), di peringkat awal kemunculan pergerakan menuntut kemerdekaan sebelum dan

selepas Perang Dunia II ialah Pengiran Abu Bakar, Pengiran Haji Muhammad Salleh bin Pengiran Anak Haji Muhammad, Pengiran Haji Metassan bin Pengiran Haji Omar, Pengiran Muhammad bin Abdul Rahman Piut, Haji Awang Hasbollah bin Muhammad Daud, Awang Marsal bin Maun, Awang Basir bin Taha, Muhammad Jamil bin Umar, Haji Mohd. Salleh Haji Masri (H.M. Salleh), Pengiran Setia Jaya Pengiran Haji Muhammad Yusuf bin Pengiran Abdul Rahim (P.Y. atau Yura Halim), Pengiran Mohd. Ali bin Haji Mohd. Daud, Pengiran Muda Abdul Kahar, Pengiran Pemancha Pengiran Anak Haji Mohd. Yassin, Awang Abdul Hamid bin Othman, Awang Othman bin Awang Sungguh, Awang Abdullah bin Awang Ali Hashim, Pengiran Damit bin Pengiran Sungguh, Awang Othman bin Bidin serta tidak ketinggalan pemimpin-pemimpin wanita,⁹ dan termasuk pemimpin-pemimpin politik pada tahun 1950an.

Walaubagaimanapun pihak pentadbir British dan di kalangan segelintir masyarakat Brunei sendiri yang tidak mempunyai semangat kesepaduan dan kecintaan kepada bangsa dan negara telah mempersendakan perjuangan pergerakan pemuda BARIP yang didokong oleh Raja mereka. Laungan perkataan yang dilafazkan oleh setiap anggota BARIP yang selalu dijadikan bahan cemuhan dan gurauan sebagai laungan 'mentega'.¹⁰ Penulis Jorger Bosch mengejek pergerakan Pemuda Brunei ini seperti berikut:

"Or whether most of those who belong to the freedom movement' realize what merdega (merdeka) means in

practice. Whether they know that if the full an unconditional merdeka for which they cry out were given to then now, it would lead to corruption without parallel".¹¹

Oleh itu jelaslah kejayaan golongan nasionalis bukan semata-mata bergantung pada semangat yang kuat dan berani namun yang penting adalah wujudnya kesepaduan, restu dan sokongan yang kuat dari golongan Kerabat Diraja misalnya iaitu Sultan Ahmad Tajuddin (1940an) dan Sultan Omar 'Ali Saifuddien (1950an dan 1960an) yang mempunyai semangat dan kesedaran yang sama seperti golongan nasionalis Brunei untuk mengembalikan kedaulatan Bangsa dan Negara ini.

Sultan Ahmad Tajuddin adalah merupakan pemimpin Brunei pertama yang boleh dianggap sebagai perintis nasionalisme Brunei moden yang senantiasa menyokong kuat perjuang rakyat Brunei dan merupakan pendokong utama dalam pergerakan organisasi politik dan sosial di Brunei ketika pada tahun 1940an di samping adinda baginda Pengiran Muda Omar 'Ali Saifuddien.¹² Kedua-dua tokoh Diraja ini adalah merupakan pemimpin Brunei yang terpenting dalam menegakkan dan mengembalikan kedaulatan Bangsa dan Negara Brunei. Kedua-dua pemimpin ini telah berganding bahu menyokong pergerakan awal semangat kebangsaan Brunei melalui pertubuhan Kesatuan Melayu Brunei (KMB)¹³ dan juga BARIP.¹⁴ Semangat perjuangan Sultan Ahmad Tajuddin dan adinda Pengiran Muda Omar 'Ali Saifuddien begitu menonjol sekali dalam

beberapa peristiwa penting yang hampir melenyapkan martabat dan kedudukan bangsa Melayu di Brunei tahun 1940an. Antara insiden-insiden itu ialah perkelahian Melayu-Cina di Bandar Brunei March 1946,¹⁵ perayaan mengingati ulang tahun pendaratan Tentera Bersekutu di Bandar Brunei pada 10 June 1946, peristiwa lawatan Pesuruhjaya Tinggi British bagi Asia Tenggara, Mr. Malcolm Mac Donald ke Brunei bulan Julai 1946, peristiwa sambutan ulang tahun pertama penubuhan Barisan Pemuda (BARIP) pada TM 1947 dan juga peristiwa kemangkatan Almarhumah Raja Isteri Fatimah pada tahun yang sama.

Oleh itu dalam membincangkan semangat kesepaduan di kalangan pemimpin-pemimpin Brunei yang telah berjuang bersama baginda Sultan untuk mendapatkan kemerdekaan Brunei pada awal tahun 1940an sehingga 1960an; ini dapat dilihat mulai dari sejak tertubuhnya Persatuan Sahabat Pena sehingga ke zaman Kesatuan Melayu Brunei (KMB), Barisan Pemuda (BARIP), Angkatan Murid-Murid Tua, kemudiannya beberapa buah partai politik pada tahun 1950an dan 1960an yang begitu aktif sehingga berpengaruh di luar wilayah Brunei dalam memperjuangkan kewujudan sebuah negara yang merdeka.

Bagaimanapun urutan perjuangan menuntut kemerdekaan yang bertunas pada awal tahun 1940an itu tidak berjaya mencapai matlamatnya. Perjuangan yang didokong kuat oleh Sultan Ahmad

Tajuddin sendiri sentiasa diawasi dan dikawali oleh pihak Brunei khususnya pergerakan BARIP yang dipimpin oleh H.M. Salleh iaitu pemimpinnya sendiri senantiasa dimata-matai oleh pihak berkuasa British malah H.M. Salleh pernah dipenjarakan beberapa kali kerana dituduh anti-British.¹⁶ Sesungguhnya dasar '*divide and rule*' yang diamalkan oleh pihak British memang telah berjaya mengawasi dan mengawal pergerakan politik di Brunei yang bertujuan untuk mengwujudkan kerajaan sendiri. Bagaimanapun pergerakan menuntut kemerdekaan tetap terus wujud di Brunei khususnya dalam tahun 1950an dan 1960an. Oleh itu pada awal tahun 1950 telah lahir sebuah parti yang berhaluan kiri yang bertujuan untuk mendapatkan kemerdekaan Brunei daripada naungan British. Bagaimanapun usaha mereka itu tidak berjaya dan sebaliknya gagal akibat tidak wujud kesepaduan antara sebilangan pemimpin rakyat dengan baginda Sultan. Walaupun perjuangan parti-parti politik pada tahun 1950an dan 1960an adalah mempunyai matlamat yang sama iaitu untuk mendapatkan kemerdekaan bangsa Brunei, akan tetapi kerana wujudnya sikap mementingkan diri sendiri dan tidak ada kerjasama di antara sesetengah pemimpin rakyat dan rakyat dengan baginda Sultan menyebabkan perjuangan tersebut gagal mencapai sasarannya. Ini jelas terbukti apabila pemberontakan 8 Disember 1962 dapat ditumpaskan oleh pihak Kerajaan Brunei.¹⁷

Sultan Haji Omar 'Ali Saifuddien telah meneruskan usaha baginda untuk mendapatkan kemerdekaan Brunei daripada British

dengan mengadakan beberapa perundingan dengan berdasarkan perjanjian perlembagaan yang telah diadakan dengan pihak British pada tahun TM 1957 dan TM 1959. Usaha-usaha ke arah kemerdekaan itu juga telah diteruskan oleh Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izaddin Waddaulah Sultan Dan Yang Di-Pertuan Negara Brunei Darussalam setelah menaiki takhta pada 1 Oktober 1967.¹⁸ Oleh itu pencapaian kemerdekaan Brunei yang telah dilaungkan dan juga telah ditanamkan pada tahun 1930an dan 1940an itu telah dapat dilaksanakan dengan tercapainya kemerdekaan Brunei pada 1 Januari 1984. Pencapaian ini adalah hasil wujudnya semangat cintakan Negara, Agama dan Raja. Tanpa ada kesepadan yang erat di antara rakyat dengan pemimpin maka bangsa dan negara itu hancur dan binasa. Oleh itu, keteguhan dan kemantapan politik sesebuah negara itu lahir adalah akibat daripada wujudnya semangat kegigihan dan kebijaksanaan Kebawah Duli Yang Maha Mulia Sultan Haji Hassanal Bolkiah Mu'izaddin Waddaulah yang telah menempuh pelbagai cabaran dan rintangan memastikan survival Brunei dalam arena politik antarabangsa.

Pada tahun 1950an dan 1960an antara isu-isu penting yang menjadi cabaran dan rintangan bagi pembentukan bangsa dan negara yang merdeka ialah proses perundingan dengan kerajaan British dan juga sikap pegawai-pegawai British yang memegang kuasa di Brunei. Mereka ini mempunyai ide dan cadangan yang

berbeza mengenai masa depan politik Brunei. Perkara ini menjelaskan perhubungan dan perundingan di antara kerajaan Brunei dengan British, misalnya Sir Anthony Abell, Pesuruhjaya Tinggi bagi Brunei mahukan penyatuan Brunei dengan kedua wilayah Borneo (Sabah dan Sarawak).¹⁹ Konsep ini juga telah diperjuangkan oleh PRB sejak pemberontakan 8 Disember 1962. Dengan perkataan lain perbezaan dalam matlamat yang hendak dicapai telah membawa kehancuran dan kebinasaan kepada rakyat Brunei sendiri.

Perbezaan sikap di antara baginda Sultan Haji Omar 'Ali Saifuddien dengan sebahagian daripada rakyat juga wujud pada tahun 1961, apabila Tunku Abdul Rahman, Perdana Menteri Persekutuan Tanah Melayu mencadangkan Gagasan Malaysia bagi jalan singkat ke arah kemerdekaan. Kerajaan British juga telah memberi nasihat kepada baginda Sultan Haji Omar 'Ali Saifuddien supaya menyertai Malaysia untuk mendapatkan kemerdekaan. Demi survival politik Brunei, baginda Sultan Haji Omar 'Ali Saifuddien telah menggunakan dasar diplomasi dalam mengendalikan hubungan luar Brunei dengan pihak British dan Persekutuan Tanah Melayu sebagaimana kata pepatah seperti 'menarik rambut dalam tepung'. Dan akhirnya baginda berjaya membuat satu keputusan yang baik demi kebaikan masa depan rakyat dan negara Brunei walaupun ada sesetengah rakyat menentang pendirian baginda itu. Baginda telah mengumumkan mengenai pendirian Brunei dalam rancangan

Gagasan Malaysia yang telah dinyatakan pada bulan Disember 1963

"Brunei decided to close her doors to Malaysia".²⁰

Meskipun rancangan penubuhan Malaysia ini telah menyebabkan Brunei terseret ke arena politik antarabangsa iaitu era konfrontasi, Malaysia-Indonesia 1961-1965, akibat daripada tindak tanduk PRB yang mahu kemerdekaan Negara Kesatuan Kalimantan Utara. Baginda Sultan dapat mempertahankan survivalnya dengan bantuan Tentera British dan Tentera Berikat walaupun terpaksa membelanjai berjuta-juta ringgit untuk menanggung kos operasi peperangan di perbatasan Borneo selama tiga tahun 1963-1965. Dalam era yang sama Brunei juga menghadapi ancaman pergerakan Komunis yang juga wujud di Brunei dan di sempadan Borneo. 'Cold War' dalam tahun 1950an dan 1960an adalah isu penting yang juga mempengaruhi perkembangan politik Brunei dalam menentukan masa depannya.

Memang tidak dinafikan akan peranan yang telah dimainkan oleh baginda Sultan Haji Omar 'Ali Saifuddien dengan didokong oleh rakyat Brunei yang berhaluan kanan dalam mengembalikan kedaulatan Brunei sebagai sebuah negara yang merdeka. Usaha-usaha ini bermula sejak baginda menaiki takhta kerajaan pada tahun 1950. Titik permulaan kejayaan perjuangan baginda dalam mengambil kuasa pemerintahan dalam negeri dari tangan Residen British²¹ bermula dengan wujudnya Perlumbagaan Negeri Brunei

1959 yang Brunei telah merdeka dalam negeri. Memang diakui baginda telah berjaya menghadapi semua tekanan dan cabaran yang cuba mengugat kelangsungan pemerintahan tradisi Melayu Islam Beraja. Sebagaimana yang telah dipersetujui oleh kerajaan British dalam perundingan pada tahun 1957.

Di dalam negeri, di samping menerima tekanan daripada parti-parti politik Sultan Haji Omar 'Ali Saifuddien juga telah dinasihatkan oleh Kerajaan British supaya mengadakan reformasi demokrasi dalam sistem pemerintahan baginda. Ini jelas sebagaimana kata David Leaks bahawa pihak British telah memperbaharui tekanan mereka terhadap Sultan Omar Ali Saifuddien apabila mereka berangkat ke London selepas pilihanraya (1965). Mereka telah mempengaruhi baginda untuk memperkenalkan pembaharuan demokratik dan mengamanahkan lagi kekuasaan kepada orang-orang bawahan baginda dan bersedia bagi mendapatkan kemerdekaan penuh secepat mungkin²¹ tetapi baginda menolak dengan alasan bahawa perubahan dalam pentadbiran akan diadakan secara berperingkat-peringkat.²²

Persoalannya bukanlah baginda tidak mahu memberikan kemerdekaan kepada Brunei, sebagaimana yang dituntut oleh parti-parti politik di Brunei. Apa yang baginda fikirkan ialah sejauh manakah Brunei boleh berdiri di bawah kakinya sendiri dengan bersandarkan kepada kemampuannya pada dewasa itu, khususnya

dari segi tenaga mahir dalam bidang pentadbiran dan juga pasukan keselamatan. Maksudnya apakah rakyat Brunei mampu mentadbir negerinya sendiri tanpa bantuan daripada pihak luar dalam bidang-bidang kedoktoran, kejuruteraan, pendidikan, pentadbiran, kewangan malah juga bidang pertahanan. Dan sejauh manakah Brunei dapat mempertahankan dirinya dari ancaman-ancaman musuh luar? Inilah faktor yang menyebabkan baginda berfikir panjang dalam memberi kemerdekaan kepada Brunei. Bagi baginda kemerdekaan yang akan dicapai mestilah ada kesepadan dan sokongan kuat daripada rakyat Brunei sendiri. Oleh itu kemerdekaan yang akan dicapai hendaklah dalam erti kata yang sebenarnya kemerdekaan yang berasaskan kesepadan di antara rakyat dengan Raja supaya kesetabilan politik dan kemakuran negara dapat dinikmati.

Oleh itu penangguhan kemerdekaan pada tahun 1965 dan juga kelambatan proses pembentukan negara yang merdeka adalah kesan dari wujudnya ketidaksatuan rakyat Brunei sendiri. Wujudnya sikap tidak percaya-mempercayai di kalangan rakyat dan pemimpin Brunei menyebabkan proses kemerdekaan terbantut. Misalnya Sultan Haji Omar 'Ali Saifuddien sentiasa menghadapi segala cabaran daripada parti-parti politik Brunei yang sering menuntut perubahan-perubahan dalam sistem pemerintahan negara Brunei. Di peringkat antarabangsa, baginda juga berjaya mengendalikan tekanan-tekanan daripada pihak British dan juga ancaman dari negeri-negeri jiran.

Setelah baginda turun takhta pada 1 Oktober 1967, usaha ke arah kemerdekaan diteruskan oleh anakanda baginda Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izaddin Waddaulah. Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izaddin Waddaulah telah membuat persediaan yang lengkap dan sempurna terlebih awal sebelum Brunei menjelaki kaki ke era kemerdekaan demi survival masa depan politik Brunei. Langkah-langkah yang diambil oleh baginda Sultan Haji Hassanal Bolkiah dalam menanaikan beberapa isu penting yang dihadapi oleh Brunei antara tahun 1967 sehingga 1983 adalah satu pembuktian sejarah akan ketokohan baginda sebagai seorang Raja yang senantisa disokong oleh rakyat Brunei demi kemajuan dan, kemakmuran Negara Brunei Darussalam.

Dalam perjuangan mendapatkan kemerdekaan Negara Brunei Darussalam terdapat tiga proses yang dilalui oleh negara ini dibawah kepimpinan tiga orang sultan yang memerintah. Peringkat awal ialah pergerakan nasionalisme Brunei pada tahun 1940an. Sultan Ahmad Tajuddin adalah merupakan pengasas yang awal yang menjadi perintis ke arah pertumbuhan dan pekembangan kesedaran kebangsaan di kalangan rakyat Brunei disamping disokong oleh Pengiran Muda Omar 'Ali Saifuddien. Peringkat kedua, pada awal tahun 1950 sehingga 1967, baginda Sultan Haji Omar 'Ali Saifuddien telah bertanggungjawab merancang dan merundingkan bagi kewujudan sebuah negara Melayu Islam Beraja

yang merdeka. Peringkat ketiga adalah merupakan zaman persediaan dan pencapaian kemerdekaan di bawah kepimpinan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaullah, Sultan dan Yang Dipertuan Negara Brunei Darussalam di antara tahun 1967-1984. Sebagai rakyat dan penduduk negeri ini kita haruslah terus berusaha untuk mempertahankan kedaulatan negara yang telah diperjuangkan oleh generasi Brunei yang terdahulu yang menjadi pengasas kepada semangat patriotisme orang Melayu bagi mewujudkan sebuah negara yang berdaulat. Sesungguhnya pencapaian kemerdekaan yang telah dinikmati selama 21 tahun ini adalah hasil dari titik peluh perjuangan tiga generasi rakyat dan pemimpin Brunei yang mempunyai semangat kesepaduan dalam memperkasa mandiri Bangsa Melayu demi kesejahteraan, kemajuan dan kemakmuran Negara Brunei Darussalam.

Notakaki

¹ Muhammad Hadi Abdullah, *Sejarah Brunei Menjelang Kemerdekaan*, Dewan Bahasa dan Pustaka, Kuala Lumpur, 1995, h. 70-75.

² *Ibid.*

³ Temubual dengan Sir John Peel (Residen British di Brunei Julai 1946-Januari 1948), Cambridge St, London, 14 Ogos, 1995.

⁴ Jorger Bisch, *Ulu: The World End*, George Allen and Unwin Ltd: United Kingdom, 1962, h. 42-46.

⁵ Muhammad Hadi Abdullah, 'Kesedaran Semangat Kebangsaan Brunei', *Jurnal Darussalam*, Pusat Sejarah, Brunei, Bil. 1, 1992, pp. 140-154.

⁶ Muhammad Hadi Abdullah, '*Ibid.*

⁷ Muhammad Hadi Abdullah, *Ibid.* Lihat juga Muhammad Hadi, 'Sejarah Brunei Menjelang Kemerdekaan' h. 75-80.

⁸ Muhammad Hadi Abdullah 'Sejarah Brunei Menjelang Kemerdekaan', Dewan Bahasa dan Pustaka, Kuala Lumpur, 1995, h. 64-65.

⁹ Pehin Orang Kaya Amar Diraja Dato Seri Utama (Dr.) Awang Mohd, Jamil Al-Sufri, 'Brunei Darussalam: the Road to Independence'. *Ibid.* h. 9-10.

¹⁰ Jorger Bosch, 'Ulu: The World End; George Allen and Unwin Ltd, United Kingdom, atau lihat juga Muhammad Hadi Abdullah 'Sejarah Brunei Menjelang Kemerdekaan', h. 73.

¹¹ *Ibid.* h. 42.

¹² Pengiran Muda Omar Ali Saifuddien telah dikurnia gelaran wazir menjadi Pengiran Bendahara Seri Maharaja Permaisuara oleh Sultan Ahmad Tajuddin Akhazul Khairi Waddien pada 18 Julai 1947.

¹³ Muhammad Hadi Abdullah, 'Semangat Kebangsaan... *Ibid.* h. 140-152.

¹⁴ Muhammad Hadi Abdullah, 'Brunei's Political Development and the Formation of Malaysia: 1961-1967', Ph.D Thesis, University of Hull, 2002, h. 15.

¹⁵ Pehin Orang Kaya Amar Diraja Dato Seri Utama (Dr.) Haji Awang Mohd. Jamil Al-Sufri, 'Brunei Darussalam: The Road to Independence', Brunei History Centre, Brunei. 1998, h. 5-6.

¹⁶ Muhammad Hadi Abdullah, 'Sejarah Brunei Menjelang Kemerdekaan', *Ibid.* h. 58-93.

¹⁷ Muhammad Hadi Abdullah, '*Ibid*', h. 184-210.

¹⁸ Muhammad Hadi Abdullah, '*Ibid*', *Ibid.* 217.

¹⁹ Muhammad Hadi Abdullah, ' Brunei Political Development and the Information of Malaysia': 1961-1967', *Ibid.* h. 17-32.

²⁰ Muhammad Hadi Abdullah 'Brunei Political Development... *Ibid.* 159

²¹ Berdasarkan Perjanjian 1905/06 Sultan Brunei dikehendaki menerima seorang penasihat British yang mana baginda Sultan dikehendaki menerima nasihatnya. Berdasarkan perjanjian ini maka kuasa memerintah negeri ialah diambil oleh Residen British dan baginda Sultan hanya berkuasa dalam bidang agama dan adat istiadat.

²² The British renewed pressure on Sir Omar when he went to London after the elections, (1965) where they began pressuring Sir Omar to introduce democratic reforms, delegate more powers to his underlines and start preparing for full independence as early as possible (David Leake, Jr., Brunei: The Modern Southeast - Asian Islamic Sultanate, F